

pubescentia, clavo distinctius, crebre punctulato, in mare sæpe infuscato, macula apicali nervoque medio corii et apice cunei, nigro-fuscis; membrana dilute fusca, macula pone cuneum laterali, obsoleta, albida. Corpus nigrum, nitidum, tenuiter pubescens, genitalibus flavis. Pedes dilute flavescentes, dense, breviter albido-pubescentes; tarsis articulo ultimo unguiculisque nigris.

31. *Capsus elegantulus*: angustatus, dilute virescens, nitidus, sub-glaber; antennis, capite, prothorace scutelloque nigris; capite sublævi, postice maculis duabus, transversim positis, dilute virescentibus; hemelytris intus leviter infuscatis; membrana, abdomine supra medio tarsisque apice fuscis. ♂♀. Long. 4, lat. $1\frac{1}{4}$ — $1\frac{1}{2}$ millim.

Capsus elegantulus MEYER Rhynchot. I. 86. 69. T. 5. f. 2.

Habitat in gramine locis humidis prope Holmiam mense Julio passim. In Westrogothia et Bahusia individua nonnulla legi.

Capsa roseo magnitudine æqualis. Caput sub-triangulare, nigrum, nitidum, læve, glabrum, supra modice convexum, postice utrinque ad oculos macula mediocri, rotundata, dilute virescente; rostro inflexo, pallide luteo-virescente, apice infuscato; oculis rotundatis, valde convexis, nigro-brunneis. Antennæ corpore nonnihil breviores, sub-tenuis, nigrae, breviter pubescentes, articulo primo crassiore, basi nonnihil tenuiore, capite transverso dimidio longiore, articulo secundo præcedente $2\frac{1}{2}$ longiore, tertio et quarto tenuioribus, simul sumtis antecedente vix longioribus, ultimo penultimo dimidio brevior. Prothorax latitudine postica dimidio brevior, antice capite angustior, truncatus, lateribus basin versus sensim modice oblique ampliatus, postice truncatus, angulis obtusis, sub-elevatis; niger, sub-nitidus, obsolete, crebre punctulatus, ruga antica bilobata, paullo elevata instructus. Scutellum triangulare, modice convexum, nigrum, sub-nitidum, subtilissime, crebre punctulatum. Hemelytra dilute virescentia, sub-nitida, vix punctulata, intus ad suturam plus minusve late infuscata; membrana dilute fusca. Corpus dilute virescens; pectore, abdomineque supra in medio, nigris. Pedes dilute virescentes; tibiis tenuiter parce spinulosis; tarsis apice leviter infuscatis.

32. *Capsus constrictus*: elongatus, dilute virescens, nitidus, pubescens; capite nigro, orbitis antice maculaque oblonga media dilute virescentibus; antennis tenuibus, fusco-annulatis; prothorace subconico, ante medium transversim bi-impreso, antice utrinque infuscato; scutello basi fascia transversa, postice bi-sinuata maculaque apicali, longitudinali, nigro-fuscis; hemelytris albidis, corio macula parva, apicali, fusca; femoribus subtiliter fusco-maculatis.

Mas: elongatus, antennis longioribus, prothorace postice latiore, leviter rotundato-emarginato; membrana hemelytrorum completa, nervo basali extrorsum infuscato; abdomine angusto, apice sub-clavato, flavescente. Long. 5, lat. 1 millim.

Femina: oblonga, antennis brevioribus, prothorace postice minus lato, truncato, ante medium magis elevato, signaturis scutelli